

# Emprender d'enconuscher la Svizra

## Barat da giuvenils

DA LUCAS DEPLAZES / ANR

■ **La «ch» Fundaziun e la Pro Patria vulan promover da cuminanza il barat da scolars e da giuvenils. La giuventetgna duai emprender d'enconuscher e da chapir meglier la Svizra e sias ritgezzas culturalas.** La nova lescha da linguas pretenda da promover la chapientscha vicendaivla cun intensivivar il barat da scolars e giuvenils tranter las regiuns linguisticas. *Sandra Maissen*, la manadra da fatschenta da la Fundaziun «ch», ha menziunà che dal 2002 fin 2010 han pudì vegnir promovids projects da barat da var 750 classas da tut las parts dal pajais. Quai saja stà pussaivel grazia al sustegn finanziel da la Pro Patria. Uss èn exausts ils meds financials.

### Augmentar il barat da classas

La plurilinguitad saja ina forza da la Svizra ed il mantegniment e la tgira da nossa ritgezza culturala-linguistica muntia ina gronda sfida, ha punctuà *Sandra Maissen*. Il barat da classas è in instrument impurtant per promover la chapientscha vicendaivla. Finamira saja da dublar il dumber annual d'actualmain 15 000 scolaras e scolars durant ils proxims tschintg onns. La cussegliera guvernativa da Friburg, *Isabelle Chassot*, ha accentuà la muntada d'in barat da classas per emprender da discuorer ina segunda lingua naziunala e per promover la chapientscha per las culturas ed il funcziunament da la Svizra quadrilingua.

Sco quai che *Carlo Schmid*, il presi-

dent da la Pro Patria, ha annunzià vul la fundaziun reactivar e promover il barat da classas. Per quest motiv stat il dun da la festa naziunala da quest onn sut il motto: «Il barat da giuvenils – emprender d'enconuscher e da chapir meglier la Svizra». La finamira è da metter a disposiziun a «ch» suenter l'acziun 650 000 francs. Grazia a sia experientscha e cumpetenzza en dumondas concernent il barat da giuvenils è la Fundaziun «ch» per la Pro Patria betg mo in partenari ideal, mabain er in garant ch'il bonus dumandà da la Pro Patria vegnia concedì exclusivamain a projects da barat da buna qualitat.

La Pro Patria e la Fundaziun «ch» pussibileschan a partir dal 2011 fin 2016 a

las scolas dal stgalim primar e secundar I agids da finanziaziun per projects da barat cun scolas partenarias d'autras parts dal pajais. Ina dumonda pon far scolas che sa participeschan gia u che vegnan a sa participar en il futur a la vendita da las marcas postalas e da las ensainas dal prim d'avust.

## Pro Patria

Pro Patria è vegnida fundada l'onn 1909 cun la finamira da far attent a la fundaziun da la Svizra e da promover sias ovras culturalas e socialas. En il senn da solidaritad organischa la Pro Patria collectas e donaziuns e punctuescha ses sustegniment per valurs ed ovras da nossa Svizra.

L'onn 1910 ha Pro Patria organisà l'emprima collecta. Dapi sia fundaziun ha ella recaltgà var 500 milliuns francs ch'ella ha mess a disposiziun ad instituziuns ed ovras culturalas e socialas. Sustegn ha la Pro Patria già da la PTT/La Posta che è stada pronta d'edir cartas per la festa naziunala e marcas postalas cun in supplement en favur da la Pro Patria. Dapi l'onn 1923 vegn la Pro Patria er sustegnida cun l'ensaina dal prim d'avust. En ils onns 1912 fin 1987 èn vegnidas organisadas indesch collectas en favur da la Crusch cotschna e per l'agid a las mammas. Actualmain sustegna la Pro Patria il barat da classas che duai confruntar ils giuvenils cun «l'autra Svizra», ina acziun impurtanta per la coesiun da la Svizra.



**Carlo Schmid, il president da la Pro Patria, e Sandra Maissen, la manadra da fatschenta da la Fundaziun «ch».** FOTO L. DEPLAZES